

光緒江西通志

江西通志卷四十八

輿地略四

風俗

東南曰揚州其川三江其浸五湖其利金錫竹箭其民
二男五女其畜宜鳥獸其穀宜稻

周禮職方氏

初淮南王異國中民家有女者以待游士而妻之故至
今多女而少男本吳越與楚接比數相并兼故民俗略
同吳豫章出黃金然堇堇物之所有取之不足以更費

漢書地理志

矯矯揚州江漢之漭彭蠡既豬陽鳥攸處橘柚貝璠
琨篠簜閩粵北垠沅湘攸往

揚雄
箴

江南之氣躁勁厥性輕揚

晉書地理志

豫章之俗頗同吳中其君子善居室小人勤耕稼衣冠之人多有數婦及舉孝廉更娶富者前妻雖有積年之勤子女盈室猶見放逐以避後人俗少爭訟而尙歌舞一年蠶四五熟勤於紡績亦有夜浣紗而旦成布者俗呼爲雞鳴布鄱陽九江臨川廬陵南康宜春其俗又頗同豫章而廬陵人龐醇率多壽考然此數郡往往畜蠱而宜春偏甚其法以五月五日聚百種蟲大者至蛇小者至蝨合置器中令自相啖餘一種存者留之蛇則曰蛇蠱蝨則曰蝨蠱行以殺人因食入人腹內食其五臟死則其產移入蠱主之家三年不殺他人則畜者自踵其弊累世子孫相傳不絕亦有隨女子嫁焉干寶謂之鬼其實非也自侯景亂後蠱家多絕旣無主人故飛游

道路之中則殞焉

隋書地理志

江南東西路蓋禹貢揚州之域當牽牛須女之分東限七閩西略夏口南抵大庾北際大江川澤沃衍有水物之饒永嘉東遷衣冠多所萃止其後文物頗盛而茗薺冶鑄金帛杭稻之利歲給縣官用度蓋半天下之入焉其俗性悍而急喪葬或不中禮尤好爭訟其氣尙使之

然也

宋史地理志

地方千里水路四通風土爽塏山川特秀奇異珍貨此焉自出奧區神臯處處有之嘉蔬精稻擅味於八方金鐵篠簜資給於四境沃野開闢家給人足畜藏無闕故穰歲則供商旅之求饑年則不告臧孫之糴人食魚稻多尙黃老之教重於隱遁蓋洪崖先生徐孺子之遺風

雷次宗
豫章記

南昌派江匯湖右荆左浙帆檣所集江西一都會也九江獨據上流人有市利南康臨彭蠡縮隘土瘠時有寇盜饒州稱爲裕阜廣信傳道下邑殷盛撫州人悍多山寇而衣食自足頗憂兼并建昌僻在東南卽有藩封亦稱安輯南安贛州則汀漳雄韶山嶠會焉林深谷邃寇賊淵藪撫臣提兵牽制數省軍門之費不煩度支苟得其人南服一壯鎮也袁州地偏長沙逋民客戶喜獄好爭議察旣難綏馴不易臨江瑞州素稱樂土吉安山雄水秀人才輩出地利亦饒甲於諸郡大抵江西之民質儉勤苦時有憂思至爭曲直持官府卽費財不吝其土窄逐末不務稼穡至有棄妻子經營四方老死不歸者

鄴曉地
理述

南昌府

范宣家於豫章常以誦讀爲業譙國戴逵等皆聞風宗
仰自遠而至諷誦之聲有若齊魯太原中順陽范甯爲
豫章太守甯亦儒博通綜在郡立鄉校教授恆數百人
由是江州人士並好經學化二范之風也

晉書
列傳

南昌於地志爲吳分其所領八州其境方數千里其田

宜秔稌其賦粟輸於京師爲天下最

晉書
東門記

勤生而嚮施薄義而喜爭

晉書
峯院記

有秦伯虞仲季子之風故處士有巖穴之雍容有屈原

宋玉枚臯之筆故文章有江山之秀發

黃庭堅
道院記

故家遺俗皆知尙氣節畏清議

黃幹
文

禩鬼之俗習而未變凡有疾病多聽於巫

續豫章志

其人衣冠其食稼穡詩書藝文棟宇布帛

虞集

士知尚儒民皆務本

元富州志

人稠而勞醇悍相半事煩訟多為十三郡之最

鄧元錫方域志

禮義之俗不因時變學者率以重吏輕儒為恥

宏治志

士矜義概人絕繁華有齊魯唐魏之遺風

盧廷樸舊志

崇名教而脩身慎行紹文獻而接武聯鑣市井多儒雅

之風田野無靡麗之習

郡志

南新豐進厚於絃誦薄於蓋藏甯武奉靖饒於山澤儉

於制科

萬恭撰志

士解經傳雅學積文而真知實踐者亦屢屢有之俗尚

清雅崇儒好客邨落細民皆勤於稼穡敏於役作秉尊

上孝弟之心然尙氣太過小忿輒至鬪訟

丁之翰圖經

平疇沃壤俗勤於稼穡薄自奉務儲積

南昌縣圖經

土夷人醇詩書之聲四封相接士夫惜名節恥干謁鄰
居有貴顯者或終身未嘗往來仕苟貪婪轉相唾罵偶
會多不爲禮雖屠人牧豎亦知揖讓而道經傳之語但

地狹民稠多食於四方所居成市

宏治南昌縣志

簪纓比屋冠蓋錯途俗尙含宏人操冰玉

喻均撰志

西山秀鬱代生聞人邨落細民耕稼之隙亦遣子弟入
學禮義之風優於他邑 人性剛峭土產頗饒鮮事商

賈

新建縣圖經

散原奇麗雙江匯環都邑雄觀盡在茲邑圩田旣興苗

畚攸暨乾溢豐歉氓命懸綫

趙秉忠圖說

士行篤於儒業擢高科登膺仕者聯鑣接武無曠土無

游民

宏治豐城志

世俗櫛比漸於禮教士之譽文蜚藻猶有龍光斗牛之

氣至於鴻鉅之業後先相望

喻均撰志

民率忠樸士高節概風候近馴金矢鮮入

進賢舊志圖說

西南多文而顯東北多獷而悍

萬恭撰說

農務耕桑士勤經史

宏治奉新志

儒有都人士之風農有田舍翁之俗

萬恭撰說

縣雖僻小而山深谷窮其俗樸厚而勤耕織士尚雅素

有朱陳邨之俗焉

靖安圖經

不尚浮靡不作商賈多好學

宏治靖安志

男勤稼穡女務蠶績

武甯圖經

槿廬繩樞以耒耜機杼自長養

萬恭撰說

居市井者多文雅處田里者無器訟

宏治甯州志

其君子巍簪紱其細民勤耕織

萬恭撰說

瑞州府

藝文儒術爲盛

杜佑通典

江西之俗其細民險而健以終訟爲能惟筠州獨不聞

於訟 吳楚之君好勇故其民樂鬪而輕死江漢之俗

尙鬼故其民尊巫而淫祀

黃庭堅江西道院賦

吏民樸野

蘇轍聖祖殿記

其人稼穡漁獵其利粳稻竹箭梗枏茶楮民富而無事

蘇轍筠州聖壽院法堂記

人好經學尙清淨

豫章郡志

地僻絕為山水之國華林嘯聚民俗滋頑

鄧元錫方域志

筠袁贛吉腦後插筆

四郡謠言好訟也

男女之別嚴而婚姻論閥閥主僕之分明而城市尙與

阜市無娼優人無賭博

郡志

珥筆之民新昌頗多積年之害高安為最

郡志

吾筠俗樸而風質士多醇茂

傅孟春高安筠陽書院記

高安瘠土僻處巖礪故其民儉而思謹

高安縣志

士游於學農勤於食工商之事舉不足以動其心故習

俗文而非侈質而非陋

熊良弼新昌國經序

邑之秀民多文儒自振家給人足無羨慕於外

雷孝友重修新

昌縣門樓記

上鄉山深俗厚下鄉土瘠農勤

新昌縣志

俗儉多富氣高好爭

新昌縣志

上高在筠尤稱易治其地僻其俗尙禮其民簡儉而專

力於穡事公府追攝不勞鞭扑

張昇送上高令序

袁州府

州小地狹賦稅及時民安吏循閭里無爭

韓愈袁州謝表

士夫秀而文細民險而健

黃庭堅道院賦

地接湖湘俗雜吳楚壤沃而利厚人繁而訟多

楊侃郡廳記

士力學而知廉恥民樂善而好儉

阮閱無訟堂記

儒風之盛甲於江右

張九成州學記

士人好恬靜勵廉隅布衣蔬食不入公府終歲不至長

吏之庭

張栻記

山高水清好尙儒雅有豪傑之士

羅秀序

分宜為袁鉅邑士生其閒率崇節概而敦詩書

汪諸學記

士知廉恥不撓邑政民務農桑輸賦以時

袁采萍鄉縣應壁記

比閭有職帑庾有輸商無隱貨酤無私釀弄法者屏奸

健訟者竄迹

江淮縣治記

俗從樸素敦詩禮勤稼穡市鮮游俠鄉無惰民獨崇尚

佛老 婦女不出街市不游寺觀尤為美俗

萬載縣志

臨江府

臨江舊為文獻之邦儒先前後相望經術詞章言行風

節垂之箋述載之簡策未泯也

胡行簡臨江府儒學記

地當舟車四會之衝山峻水清逐末者多

鄧元錫方域志

臨江君子尚禮崇德小人勤力知分此雖齊魯何讓焉

明一統志

君子尚禮教畏清議崇德齒矜名檢小人安居而樂業

勤力而知禮

臨江志

山環水秀風氣攸聚故民生其閒敦本而易化士業詩

書而蹈禮義者眾

錢溥重建清江縣儒學記

風俗之厚文物之雅在楚越之閒謂之樂土

敖英清江縣題名記

俗頗尙鬼疾疫則巫進醫退每有所禳必令道士立符

用木三尺許書符其上安立室中祀以香火

清江縣志

臨江屬邑三新淦其一也土穰地廣民物蕃阜貢賦征

徭恆倍於他邑而事恆先集江右所統數十邑未有能

過之者

周敘送彭丞赴新淦序

仕者以清節致通顯爲高子弟克家鄉鄰敬禮或嬉游

墜業雖臧獲誦之憚爭競閒有終訟者共目曰刁曰不

善治家之子故淫簡訟新淦縣志

此邦風俗頗厚禮遜相師有見有聞易於入德謝諤新淦縣學記

邑多衣冠舊族世守進士業百十年有聞不衰而近世

有以清文介節名於時者州人猶能道之虞集新喻縣修學記

喻人以禮義相先以閭閻相高故雖貧墜不肯輕去其

鄉新喻縣志

山聳水激靈秀所鍾端人彥士先後相望自昔號為勝

地張芹峽江縣儒學記

吉安府

衣冠所萃藝文儒術為盛雖閭閻力役吟咏不輟杜佑通典

文風盛於江右周必大詠歸亭記

由六一之鄉里家有詩書以數萬戶之井廛人多儒雅

楊炎正州學上梁文

序塾相望絃誦相聞

王陶太和公應記

此州之君子皆顏魯公之流風遺俗也

歐陽守道顏魯公祠記

咽喉荆廣唇齒淮浙江山映帶在眉宇間

劉彥登譙門記

牒訟疏簡徵輸期調頗先

王陶記

俗尚儒學敬老尊賢豪偉之士喜賓客重然諾輕貨財

明解籍陳君墓志

士瘠民稠所資身多業鄰郡其俗尚氣君子重名小人

務訟兼之軍民雜襲豪猾恣騰吏治鮮效廬陵泰和最

稱難理永甯龍泉稍稍易與云

羅洪先輿圖記

南接贛江北竟淦水環地幾二千里據江上流人龐醇

多壽考家有詩書塾序相望爲忠義文獻之邦冠冕江

右焉君子尙名小人尙氣頗多訟稱難治

鄧元錫
方域志

唐顏真卿從事吉州鏗旬大節誦慕無窮至歐陽修一代大儒開宋三百年文章之盛士相繼起者必以通經學古爲高以救時行道爲賢以犯顏敢諫爲忠家誦詩書人懷慷慨文章節義遂甲天下故家世胄族有譜家有祠歲時祭祀必以禮長幼之節疏不閔親貴必下賤蒼頭臧獲長子孫數十世名義相續屬不絕家範肅於刑律鄉評嚴於斧鉞 廬陵舊稱節義之鄉其人秀而文磊落偉達有周平園文文山之遺風焉然城市人物繁夥俗漸滑於誇麗此其一變也 泰和士人綽有風致好書畫細民多技藝而物產頗饒於他邑譚經之士

知愛名檢荷鋤之夫不忌貴游山谷編氓奉公趨義赴
之如流水 吉水之土瘠薄削隘物力無所出計畝食
口僅可得什三焉民多取四方之資以爲生人人自愛
而重犯法先行誼而後紉恥辱焉

郡志

環吉水百里之疆多業儒環吾鄉遠近之間多世族儒

業多故宦達之士隆世族多故詩書之習盛

周牧石壁集

董良史書記云永豐爲廬陵之支邑細民力穡而純士
大夫美秀而文西北諸鄉士多奇俊而敦禮義東南接
鄰贛地山險水激人性輕悍而健訟邵銳亦云民善畜
藏好剛自負易以義動難以威劫大率民俗內外嚴整
樸儉甚類文江而猾健少異 安福地介吳楚民俗不
齊大率樸儉勤穡而士豪邁自負 龍泉民俗椎魯勤

稽務農植穀不事遠游士亦嗜問學然聲教文物與中
郡士大夫絕少交游而深山茂林之民獷悍難馴殆壤
地磽駁不純有以致之 萬安士文雅俊逸篤誦經史
沿江小民以漁舟爲家至長子孫

郡志

永新之爲邑僻在江南西道與荆楚爲鄰其地有崇山
疊嶂平田沃野又有寒泉清流以灌溉之其君子好義
而尙文其小人力耕而喜鬪其俗信巫鬼鳴鳴鼓角

雞卜以祈年

李遠送賀著作
出宰永新序

撫州府

其民樂於耕桑以自足故牛馬牧於山谷者不收五穀
之積於郊野者不垣而晏然不知枹鼓之警發召之役
也

曾鞏攝
峴臺記

撫之邑屬非特地大人庶冠冕一路而文物盛多亦異

他邦

周必大
登科記

山川風俗之美名儒巨公彬彬輩出故家遺俗皆知尙

氣節畏清議

黃幹
集

民秀而能文剛而不屈

黃幹論
俗文

環水峙山高曠明麗扶輿清淑之氣特鍾於人

黎醇松
圖亭記

獄訟清簡

元撫州推官
廳題名記

地平衍介江湖閒風愿俗樸賢哲輩出人稠多商行旅

達四裔有棄妻子老死不歸者

鄧元錫
方域志

訟煩事冗糧重難治

郭子章
豫章記

簡略樸儉大率嗇於財而吝於施

舊志

山川壯麗風氣敦龐民樂田疇士尙文雅絃誦之聲無

間於井社衣冠之家退讓謙抑習而成風可爲善邑明
自成化以來困於起運嘉靖閒苦於寇掠民稍生心漸
移美俗乃激而好競轉而好奢邑狃豐亨俗浸囂侈

府志

附論

宋有二周三陸之理學元有危葛曾劉之文章忠義若
鄧傳黃嘏孝烈則吳陳二女餘風流俗傳於後者可知
葉夢得槐堂書院記云山川炳靈儒英並出蓋不誣也

永樂志

民務耕作故地無遺利土狹民稠爲商賈三之一士秀
而文好矜持嚴氣節婚媾尙門第

嘉靖志

臨川靈谷銅陵諸峯環列於屏障其俗風流儒雅喜事
而尙氣有晏元獻王文公爲之鄉人故其人樂讀書而

好文詞

謝逸文集序

撫爲江右名郡崇仁則撫之大縣人物蕃庶風俗醇龐

周是修書

金谿重岡複嶺土沃稅輕民勉質遷士勤學業若宋儒之道術昭代之勲庸哀然一郡舉首豈非雲林躍馬鍾靈固有自邪顧西連閩建北接安東山藏莽伏慮未釋

也

趙秉忠與地圖說

宜黃素號多士遭世休明風化陶淬儒學日盛絃歌洋

洋達乎四境

鄒盤儒學新田記

其地僻其土腴瘠半其俗男耕女織士服詩書敦行誼人不知商賈末作故無偷盜闖很侈靡之習稱易治焉

譚綸宜黃城記

勇決而尙義精悍而能文

樂安縣志

谿深而谷窈石峭而泉冽其人多尙節槩敦樸茂務耕織士大夫潔行好修家詩書而人縫掖猶有鄒魯遺風

任氣好剛輕生樂鬪

東鄉縣志

建昌府

無土山無濁水民秉是氣往往清慧而文

劉禹錫文

建昌之爲郡據江西一道東南上游其地山高而水清其民氣剛而才武其士多以經術論議文章致大名其他能以詞藝致身取高科而登顯仕者亦不乏於世

朱子

建昌軍進士題名記

比屋絃誦與鄒魯同風

張允修平遠臺記

其人足衣食俗椎少機不肆文法爲獄訟事閒有豪猾

賤之百端卒無敢言以豐富之資加自重惜李觀肝江

志引誤
今校正

歲常豐饒民皆禮讓王平叔建昌軍記

盱江世多君子傅岑四賢堂記

舊俗醇嫫變自庚寅民習爭戰諶佑平寇碑

為文學之懿於東南在甲乙之目才學輩出亦多廉

仕成集修學記

市肆繁密邑屋華好方輿勝覽

建昌府在撫信邵汀贛之中滅贛之曠幾撫之饒遠信

之衝鄰汀之僻而與邵並閩楚喉焉酌諸府之中號為

樂土羅玘序

以郡連建州會南昌而名山秀水清為江西東南上游

與閩粵爲腹背土地衍沃俗醇易治民清慧而文儒術
爲盛小人勤耕稼女子勤績紡爲東南樂區頗悍急易
發信鬼神好淫祀

鄧元錫
方域志

南城附郭縣也近撫信次水而多商新城南豐負邵廣
昌偪贛與汀山嶺限之惟力耕之民天下無事三縣之
民不出疆而食土之入

舊志

城府清暇閭里肅靜近復好古務學崇禮尙賢銳精向

往科名輩出

羅汝芳南
城縣續志

林奇谷分水透川環學富文清

刁尙能南城
縣羅城記

士君子敏而好學文而有禮

陳孔休新
城縣記

民寡求而易足故椎埋鼓鑄盜斂之姦視諸鄰有弗爲

也

會學南豐
軍山廟碑

廣昌縣邑之山磅礴而秀水清碧而駛其靈則鍾於人

其人出而爲名進士著譽當時代有之矣

習嘉言進士題名記

其民不事商賈務耕織其地山環而聳水潔而淺故氣

高好勝而多情慤質美好文而少財蓄

溫溪縣志

廣信府

尙醇質好儉約喪紀婚姻率漸於禮

隋書地理志

信州前距閩北抵越其土沃其民阜其東南之巨屏乎

楊楷學記

地多深山大谷人有巢穴其閒者數輕生好鬪脫遇儉

歲不無猩貳嘯竹之警其地上於饒其俗美於廣

王雷修城

記

市井閭溢貨賄流行

章傑郡守題名記

絃誦之聲晝夜不絕

孔武仲修學記

刻勵自奮矜謹節義山水之秀甲諸郡

袁梅亭記

信之為郡山奇而廉故人得之矜名而喜節其失也隘
水清而駛故人得之善慧而好修其失也激原隰平衍
而山澤楮舜陶冶之利聊足謀生故民得之惟土物愛
而心臧其失也嗇是七邑之同也類分之則饒玉永為
上三邑習相近也而饒以質勝鉛弋貴興為下四邑習
相近也而鉛亦以質勝其君子則亢言而厲行其小人
則少械而寡求其婦女則無故不出戶庭不事耕穫不
給薪水不行鬻於市是又七邑之同也

嘉靖舊志

民安土重業俗儉嗇矜謹節義

鄧元錫方域志

信自永嘉東遷衣冠避地風氣漸開歷唐而宋文學之

士閒出而南渡以後遂爲要區人知敦本積學日趨於
盛比入明朝二百餘年藝文學術蔚爲東南望郡下逮
田野小民生理裁足皆知以課子孫讀書爲事好勇尙
鬼之習革易殆盡 吉凶之禮今古兼行明以前冠禮
猶備三加生員之冠多於學宮行之後寢廢婚不親迎
喪事尙佛老祭以俗節尤重墓祭士夫家始用金鼓閭
閻好事者慕之寓公王源道嘗書信之土風有曰無燭
盡燒烏柏子有錢爭買紫藻田花磚堂上看禾稼石墀
墳邊聽管絃蓋異之也今無是矣

附志

玉山地居衝要民煩事夥莅官者非廉勤不能理

王叔泰德

政碑

士子力不能致書求師聞見寡陋然皆杜門揣摹帖括

之外一無泛及亦絕無奔競游揚干求詭遇之想雖達

者寥寥亦足以見其務實

譚直弋陽志論

地當閩浙吳楚之交山川孕秀代生偉人學校育材之

盛跨越遠邇

貴溪縣進士題名記

樂善知恥謹慶弔儉服用

差役以義定賦稅多樂輸

不能無訟而終訟者鮮

永平縣志

古雖嗇陋然有柳渾賢令倡之於前張叔夜忠臣陶之

於後故斯民頓改前習

廣豐舊志

鄉城互異椎魯儉樸勤本業鮮游惰

興安縣志

饒州府

有鄒魯遺風

陳靖道普

多喬木富室

劉禹錫答元稹書

忠臣孝子繼踵而出吳芮之遺風難泯王德連郡陽記

多俊秀喜儒以名節相高黃庭堅集

范希文守此其為政務名教敦尚風義為先州人仰慕

咸傾嚮之遂以成俗彭汝礪答錢尚書通書

士如東漢諸君子都頴文

惟時饒郡昔號奧區廣谷大川政富吳楚之交會流風

善政具存顏范之典型黃唐文集

饒之為郡以彭蠡鄱陽之漁浮梁之陶餘干之沃故曰

饒也若夫德興東偏之縣也去彭蠡二百里與其境隔

絕羅玘序

山川最清接吳楚秀氣文獻相續有曾范遺風輿地記

物產豐饒方輿勝覽

工巧足用懋遷以給

舊郡志

鄱陽當楚尾吳首背山環水氣候多陰民無悍戾之性其音清越其習以禮信相敦農務稼穡市務居積誦讀

之聲絡繹巷陌

鄱陽志論

江之東冠帶詩書甲於天下江南既爲天下甲而饒

人喜儒又甲於江南

吳孝忠餘干學記

其民聰慧其俗稍侈信巫鬼下里尤甚

餘干志論

樂之人文以介樂之俗質以厚

樂平縣舊志序

浮梁之俗潔而居鮮而食山川林木望之鬱鬱疏秀泉甘而土肥亦美壤矣人生其閒穎秀者爲士狡猾者爲游手富則爲商巧則爲工蓋以山甚稠田甚狹以故食多不足土與工商皆出四方以就利其富家巨室不至

於鉅萬而貧者亦不至於餒死雖遊手之徒亦皆能自
售其貨之大者摘葉爲茗伐楮爲紙坯土爲器行於中
外資國家利其餘紡布帛負販往來蓋其小者耳

汪肩吾記

東北務耕織西南樹木植至沿河一帶倚舟楫柴土之
利自給

浮梁志論

德興山峭川駛風醇俗樸

德興志論

農安畎畝士習詩書而無狡悍難馴之氣

萬年縣志論

南康府

南方之俗其在康哉

宋南康軍賜郡名詔

土地瘠薄生物不暢水源乾淺易得枯涸是以人無固

志生無定業

朱子應詔封事

民俗醇厚庭少訐訟獄少繫囚

背負匡廬前據彭蠡

地勢雄秀甲於東南禹蹟所經太史所游有聖賢遺風

朱子知南
康榜文

士皆尚質實下新奇敦行義而不偷守訓詁而不鑿雖

學問之淵源統紀或未深究然甘愛和白愛采既有進

德之地矣

呂祖謙白
鹿洞記

民醇事少號為江東道院

陳篆軍
治記

康廬壤地雖褊小實朱夫子道化之邦數十百年閒遺

風餘韻要以繼續

許子良與南
康游太守書

負山襟湖地窄田少民瘠貧

鄧元錫
方域志

南康於九江一郡也宋真宗閒始別為軍然余觀風氣

康土厚重樸而醇康之人士篤實恭謹守禮而貞良其

父老和粹安祥式模楷而壽考往往視九江有加焉

文德

翼求是
堂集

民業耕桑士習詩禮好勤謹尙儉素稱爲周朱過化之

地舊郡
志

南康負山面水土瘠民貧賦稅訟獄不當大郡十一昔
人號爲江東道院其醇簡可知矣星子介廬蠡之間地
勢傾峻山多於水都昌在郡東南據彭蠡上流地勢平
衍水多於山建昌安義在郡西南地勢豐厚山水半焉
大都地峻則氣鬱民生多質樸峭直果於赴義而以飭
廉恥爲風節地平則氣宣民生多發揚負氣勇於爭鬪
而以健訟許爲愉快故星子土狹而礪商賈不集工技
不居士矜名節宗族長幼有序百姓以力穡儉陋佐其
貧無甘脆雕績之奉婦女事紡績教坊樂戶不容市肆

庶幾稱古醇風都昌三面濱湖惟東北倚山近饒物產
沃於星子民務稼穡額徵易辦氣習醇厚土稱愿慤建
昌四衝之地輪蹄館穀騷驛不絕土廣而沃男耕女織
士習端謹衣冠人物稱最安義僻處西南然地偏務簡
弊蠹不深較建昌尤易治蓋星子之俗儉其敝也鄱都
昌之俗悍其敝也旻建昌之俗侈其敝也肆安義之俗
彥其敝也彥文英南
康府志

士慧而文民醇而樸

都昌
縣志

君子尊德而樂道小人勤耕而好禮

建昌
縣志

九江府

廬山自陶謝洎十八賢以還儒風綿綿相續不絕

白居易
集

自朱文公講學白鹿洞環匡廬山之麓士君子聞風而

起者多矣

虞集瑞昌蔡氏義學記

九江號古今重鎮俗素醇美

廬山奇秀甲天下高士

逸民所棲先賢往哲所樂流風餘澤沒世難忘

呂光發重修瑞

昌學記

土瘠民貧山高氣清習知武事

方輿勝覽

背倚匡廬控扼江湖爲重鎮民瘠貧多訟

鄧元錫方域志

潯陽擁山川之靈異聿來名賢接踵如宋周茂叔卜築

匡山之濂溪與二程諸君子講學其地直溯洙泗之源

而文教之所漸摩其流風閎千百世而常存也

趙光林重修九

江府學記

九江跨荆揚之交據江湖之會其土瘠其民樸而悍其
士侈文而尙氣其婚喪多任俗而寡儀節是故爲政者

其令宜簡其斂宜裁其刑宜慎而嚴其示宜禮

鄧繼魯名宦祠

記

人性堅貞尙氣槩其君子知恥而少事干謁其小人聽
 命而不通請求俗固好爭而聽和則止民雖守分而抗
 法亦多輸納趨時婚姻禮際服用素樸故舊相周恤詩
 書閭閻里社藹然山林之民力鋤基川澤之民業網罟
 市廛之民居貿易三時效勤冬舉百務婚重親迎喪厭
 浮屠祭知時舉教就外傳此雅俗之大都也

江殷道九府志
 民俗簡靜罕事浮靡雖富家子弟亦鮮綺羅經營惟在
 本土言語類金陵而近實婦女惟事鍼紉不解紡織舉
 葬娛屍數日近士大夫依朱子家禮鄉民化之鄉市耆
 民四時有里社之飲

德化縣志

自唐義門陳氏以來代傳孝弟民風感化俗尚農業罕

工商服飾古野

德安縣志

山險俗訐信巫好祀士尚氣槩民先勇力急功利尚文

儀

瑞昌縣志

民習耕漁之業善操舟性敦樸罕事浮靡崇孝養喜歌舞厚於故舊有賙卹之意婦人事紡織婚葬亦同德化

湖口縣志

山峻土沃俗尚文儀儒風相續民習經商婦人事紡織

彭澤縣志

南安府

地連吉贛而民無珥筆之風境接溪洞而士多絃誦之

習人知禮法俗尚樸醇

宋理宗賜道源書院額文

文物之盛與閩蜀等蘇軾軍學記

民貧多訟彭汝礪南安軍學記

風氣類中州胡長孺重建南安大成殿記

當五嶺最東為交廣襟喉地多瘴與輦人雜居頗受其

害鄧元錫方域志

南安略同楚俗火耕水耨民食魚稻無積聚衣食取給

不憂凍餒信巫鬼好鬪爭山嵐瘴氣時有舊郡志

詩書接周濂溪道學之源流人物經蘇學士名公之品

題王元渤南康古樓文

邑以壯稱民多殷富鍾贊南康通濟橋記

士農少商人果而義民直而剛劉倚友止猶學記

南康民物殷阜人文蔚興有宋以來彬彬乎號名邑焉

上猶俗號醇古人務本業

府志附論

上猶民稀而地僻歲稍凶山洞愚氓嘯聚爲寇

黃仲昭修城記

崇義俗雜五方雖風氣與三邑略同而輦人附居多射獵爲食傲很無常尙譎詐喜爭鬪

府志附論

贛州府

伉健工巧好佛信鬼

漢書地理志

嗜勇好鬪輕生敢死

董德元奏疏

風氣錯糅人多勁健尙義

李太初贛州學記

風俗篤厚而純一人物秀特而節槩

劉尙友會昌州學記

士知向學民頗遷善

舊郡志

隋唐疆圉日闊聲教寢遠人皆抗節篤志故唐書宰相

系有贛人贛俗信巫婚則用以押嫁葬則用以押喪

巫師角術時有翦扛之患舊志

風土習俗與吉州不同山川之綢繆人物之伉健大概

去南漸近得天地陽氣之偏反不可以刑威懼而可以

理義動文天祥記

比屋絃歌曳金紫而躋膺仕者項背相望龔炳記

市無方言家不靡食殊不類江之西者非下縣也羅玘文集

果而挾氣勇而喜爭楊萬里記

地界興雩田腴民勤最稱富饒兵燹以來鄰寇竊發大

半殘破婚嫁喪祭多從簡便此亦時勢使然蕭縣志

雩都風俗上富下貧少友助扶持之義然亦無甚富甚

貧殆類古之齊民冠婚喪祭尚儉居不求華服不求侈

飲食不求異器用不求奇雩都縣志

信豐其地險僻民質樸力專稼穡不事商賈婚姻非

鄰里相助

董德元記

崇尚廉恥好鬪健訟

信豐縣志

興國昔號劇盛民皆挾氣上關大率剛悍勁險尚氣喜

爭

興國縣志

地界深山長谷民鮮商販惟務農力產以田多寡為優

劣舊家崇尚朱子家禮好積古器重譜牒志銘孀婦多

守節士夫尚禮義

宏治興國志

興國為三程過化之遺其流風善俗猶有存者閭閻樸

實非達官貴人不衣羅綺

興國志論

會昌去郡頗遠士飭廉隅恬淡自守科目雖云寥落典

型代有其人

會昌縣志

婚嫻苟且喪祭疏略

安遠縣志

安遠舊俗質樸惟以耕稼為業

安遠縣志

邑風儉樸布袍椎結不尚奇巧

長甯縣志

男勤於耕女勤於織宮室服器多從質素

龍南縣志

民惟力耕不事他技輕生好鬪勇悍相角

定南縣志

甯都州

民善治生有勤儉氣士知務學無浮靡習

甯都州志

巨家寒族莫不有宗祠以祀其先曠不舉者則人以匪

類擯之報本追遠之厚庶幾為吾江右之冠焉

楊龍泉志

朱子謂古禮惟冠禮易行陽都易堂則世守之自先期

戒賓及冠三加巾服飲醺命字畢而出見於先生長者

及父之執友皆有訓辭

贛州府志

州俗款客無過五簋值宴會則倍其數復以兩而殺故有六八十器之語語雖不文豐約得中而禮行可繼

六八十

器銳

昔殷富今漸窘昔愿樸今漸饒

萬應瑞金縣志

美秀而文者或以興訟爲能獷暴者至以好鬪喜爭爲

事

瑞金縣志

書旌弔問張筵設鼓吹已爲非禮石城乃有娛尸之宴出殯之夕奏樂達旦否則人子有薄親之譏反受不孝

之名此何說也

贛州府志

男耕稼而不商賈女麻枲而不蠶桑山峭水駛生其

地者宜多暴急然秉性率皆仁慈剛很者不數觀顧獨

忍於溺女敝俗也

石城縣舊志

江西通志卷四十八

江西通志卷四十九

輿地略五

物產

金漢書地理志豫章出黃金舊志豐城縣東溪水沙中

出金今無元危素富州蠲金記事至元十四年分甯縣

彬等三十餘人商瓊者謀獻利覓官迺誘湖南淘金工易

鄉人傳壽等穴山谿畚沙石習淘金爲業歲責輸浮辦

金四兩重請行省署淘金場縣中傾之而復泊阮祥者

實司其職然豐城之金僅供一歲之入瓊稍患苦於時雖

竭力淘采地道空虛不克供一歲之入瓊稍患苦於時雖

使人走他州購金以實其數久之懼其妄覺又誣富民

地有金掘其廬舍冢墓劫取貨賄斬增廣歲賦入以錮

其事於是盡力拮克請增輸金至二十五兩九錢重以

爲己功鄉民甚惡之而亡賴者景從日眾至三百三人

焉瓊又爲之請於有司歲復掠其役豐城既無金草轉走

饒信徽衛娶江南康斬黃歲掠以進瓊既輸官而據其

贏由是致富會張國紀守撫好言利二十四年行省用

其言置金銀場於樂安縣之小曹溪課富民淘金輸官

程所入多算而免其賦於是盡檄取豐城淘金工往教

習焉瓊益以聚斂爲功復請增金三兩一錢九分六釐
重總之爲二十九兩九分六釐重矣瓊因求遷小曹場
官兼賦豐城金而豐城淘金場遂革是時豐城升爲富
州官復煩陶金家以宅役始不勝其苦而汪壽李仲何
文明等百餘人走光州不返餘徙業者相繼瓊亦去爲
鹽場官而富州金口德韶言於行省謂龍興路貢賦歲
累已也募其邑人口不宜附隸撫州蓋從富州輪之龍
興路爲便宮則富州金不宜附隸撫州蓋從富州輪之龍
九月也瓊始征金時至是四十餘年矣卽復求三十餘
人者多閭閻細民死徙亡後者有焉有後而乞丐者以拒
焉根連其宗族蔓延其鄉黨亦有之至殺子者以拒
胥徒之嚙突者乃抑令五鄉二十有七都之役於官者代
輸之凡金一兩重費至元鈔多至百廿貫總之爲鈔三
千六百貫矣因之破家者又比有焉於民之茶毒等
有不可勝言者矣州人思脫其禍若王季常王元實等
迷迷間陳於有司稍集父老議雖悉其弊然莫肯
固請於上蓋自富州再征金至是又十有七年乃始得
揭車之言行焉始車嘗言於奉使宣撫又言於監察御
史號郢頓首乞去民害觸御史怒幾得罪賴龍興推官
李崇德莫維崇力爭御史前得免至是乃言於張公榮
章及全公岳柱而二公深哀其言於是其事乃得竟聞
而州人數十年剝膚椎髓之害始一旦脫然矣噫商瓊
不足議矣彼天子之命使收此民者視其困苦漠然不

以爲意獨何與誠使士之居於鄉立於朝皆若揭車及
授經公侯斯其人豈有知而不言者哉風紀之司蒲輔
之宰皆張公全公其人豈有聞而不言者哉今富之人
感三公之德而壯車言之力相與刻石以垂永久素於
是重有感焉述文以慰州人之心而學士大夫播之咏
歌以通輿論以示勸懲未必無小補也全公同紇人後
終河南行省平章張公河間人後終司
丞揭公今爲翰林待制車其從孫云

銅西山出唐時有坑今無

鐵豐城進賢二縣出明史食貨志洪武六年置進賢新
喻分宜鐵冶所凡三今廢

茶茶譜洪州西山白露鶴嶺茶號爲絕品又西山有羅
漢茶葉如豆苗因靈觀尊者自西山持至故名茶事雜
錄雙井在甯州西三十里黃山谷所居也其南溪心有
二井土人汲以造茶爲草茶第一山谷送東坡雙井茶
詩我家江南摘雲腴落磴霏霏雪不如

方竹出奉新縣他竹各縣俱出種類甚繁

筍楊廷秀記張定叟養筍經江西貓筍未出尖雪中土兒養新甜卽今西山冬筍他處所產香味次之

雪瓜出豐城石坑色白味甘

甘薯卽山藥乾隆五十一年

救下直省廣勸栽培甘薯以爲救荒之備巡撫何裕城重刊巡撫陸燿甘薯錄通頒各屬

東湖魚東湖水清魚美

金花魚出豐城曲江金花潭故名

銀魚出進賢者佳

麥魚麥熟時出瑞河口

鰱魚出象牙潭

拔舌子出南昌市汊滌槎

鮮靖安烏石邨有世其業者色鮮味永甲於他邑

玉翼出武甯大燕山獸面四足兩翅如仙鼠飛集林木
雁多集彭蠡禹貢陽鳥攸居

苦參南昌縣出

黃精西山出

蔓菁產武陽渡建東洲者佳

香薷產武甯香柔山

麥冬產豐城龍霧洲

乳柑各縣出豐城白洲最佳

羅漢菜出西山

心子菜卽苾菜清異錄云粥筍者惡之罵曰心子菜蓋

筍奴箇妾也

瓊田草服食譜生於分甯山中八月十五日拔之一名長生草一名玉芝

萋蒿新建湖邊多有祝志萋蒿不過樵蓋樵舍以上無之

白華菜出靖安柔莖蔓延一枝五葉春種夏蒔香脆可口粵西亦有此種而味遠不及

萊菔出進賢谷岐岡者佳

烏柏油俗呼山茶子榨汁爲油其利甚溥武甯義甯州俱出

桐油出武甯義甯州利與茶子相埒

菜油油菜結實榨成油義甯州出

石黃色黃理疏以水灌之便熱以鼎炊物可熱置之則冷雷煥以示張華華曰然石也今無

煤炭豐城義甯州俱出亦名石炭漢地志豫章出石可然爲薪

絹出義甯州

葛布他處多有出西山厚田者佳吳越春秋入山采葛

作黃絲布卽此

附明王啟乞罷進貢疏臣聞防川者不患於川潰之時而患於築塞之後隄防

爲難療病者不患於病作之時而患於痊復之後調理爲難竊見江西自王浩入等倡亂以後連年用兵用力

幾耗一旦平復如新築之隄朝夕巡視惟恐其復潰新

瘥之軀動息無恙惟恐其復作誠裕民止盜損上益下

之時也陛下不以臣爲不才使居江右旬宣之官夙夜

兢惕思莫補報到任以來首詢民隱皆謂進貢未除厲

階猶在臣寢食不安是以忘其愚陋兼在待罪之時急

急爲陛下言之且以江西地方限帶山河無海錯異品

可以供上用無珍禽奇獸可以供玩好雖欲進貢不過

常物況地瘠民貧常賦之供猶至逋欠臣自宏治年開

任官於此未常見有所謂進貢自賊臣劉瑾詳傳聖旨
之後遠近皆欲白結假進貢之名爲納賄之計江西始
有進貢斂官錢入私府誅求無厭民不堪命奸人乘賈
而起流毒境內致動王師累年始平其禍皆起於進貢
今瘡痍之民甫定呻吟未已正宜休息優養以解倒懸
之急若復如舊誠恐流寇禍生亂不止於往日且如進
新筍葛不惟出筍出葛之人戶受害凡一郡之人同爲
不惟出茶出竹之人戶受害凡一郡之人同爲茶芽斑竹
不能支持則茶與竹之害騷然矣他皆類是此猶不足
惜也時新未熟已名上用使者所至凌虐官府則催辦
之害騷然矣此猶不足惜也出省藏之官銀巧作買辦
斂水夫之功錢名爲乾折雖餅罐扛樞之類皆有所出
不止十倍其價則利派之害騷然矣其取無窮其名不
一臣謂估計雖銀茶銀筍之類亦可辦也而進貢之費
不可考也迄至驛遞馬頭去處亦騷然一空下至商賈
船隻不可灣泊失今不止其害必深夫川既築不可使
之復潰病既療不可使之再發近見都御史彭澤論奏
進貢事理甚晰所司奉行之未至猶有應止而未止者如
江西地方誠宜停罷以蘇民困如蒙準言乞救該部計
議早賜施行
地方幸甚

雞鳴布隋地志豫章有夜浣紗而旦成布者名雞鳴布

今南昌出水紗布大布寇布豐城出棉布紵布絲布
紙有粉箋連七觀音疏紙等名紙箋云豫章彩色粉箋
最光滑又云永樂中江西西山置官局造紙最厚大而
好者曰連七曰觀音紙後改局信州今無復造者止土
棉紙及火紙出甯州奉新等處

酒宋張能臣名酒錄洪州酒之佳者曰雙泉曰金波今
無惟丁坊有井水重於他汲井以釀名丁坊酒以上南昌府
米高安米山生禾香茂爲米精美唐故以此名州
銀上高縣出久無

石青

石綠

黃丹俱出上高久無

茶陸羽茶穀雨前取廖暹十咏呼爲雀香焙

菜出新昌縣雲峯嶺四時不絕

羊桃實似小梨造紙者取枝葉搗汁以分張

裨似柿而小一名黃裨取汁製織造油扇

紙有老大中大羅端曬紙火紙等名出新昌

青紙三縣俱出

石珠

無名子俱出天則岡景德鎮用以繪畫瓷器

土硃卽土紅可入油飾器皿

千里光圖經出筠州生淺山及路旁味苦甘寒無毒同

甘草煎服退熱明目

仙人掌草圖經出筠州微苦烈無毒貼石壁生如掌故

名與甘草浸酒服治腸痔瀉血

柑有薄皮柑金柑獅頭柑洞庭柑

烏藥出上高烏峯故名

柿有閔柿牛心柿山柿羊矢柿

拒霜花朝白夕紅名醉芙蓉

茶花蘇子由有眞如寺茶花詩

竹唐名筠州以此

紫竹小而勁直可爲織柄筍亦甘美

竹雞

鸚鵡舊傳高安華園

一作華林山

出今不可得明天啟間知

府陶履中署內畜者逸去尋復飛還產一卵

嬾婦魚一名饒鐙炷其膏照歌舞則明照紡績則暗

頽鯉產上高武泉不可食

棉布出高安灰埠

以上瑞州府

鐵元豐九域志宋分宜十鄉貴山鐵務一明置冶所

茶茶譜云袁界橋其名甚著今稱仰山稠平木平者爲佳稠平尤號絕品

玉版筍

絲花菜萍鄉泉江水中出黃山谷詩絲花出泉邨

酒晉地道志宜春縣有美酒隨歲舉上貢豫章書云今無佳酒

石髮萍鄉出

蕈出武功山

龍鬚草萍鄉出可作席

茶油茶子搗之爲油

土珠萬載赤硃岡出

香櫟類橙色黃形圓而香

楊梅王荆公送袁州使君曹伯玉詩云溼溼嶺雲生竹
箇冥冥江雨熟楊梅

金橘

地黃宜春分宜出

木蓮卽辛夷出仰山三鑊潭

紫金藤

天冬

麥冬

石楠

茴香

山鳳凰卽錦雞

石燕分宜洪陽洞萬載雲峯洞俱有

金鯉

比目魚舊傳宜春靈泉出今不常見

金線蛭出木平山每噓有佳客至

表心紙

葛布

布宋劉克莊貢布表舜紘方葵適當被袵之時禹服攸

下同爰謹貢絺之典意均芹曝禮寓篚苞恭惟皇帝陛

下資以儉慈麗惟道德輕徭薄賦首捐布縷之征固本

深根尤絀繭絲之說凡受專城之寄謹修任土之宜臣

叨守春臺迭瞻薰殿屬屆金流之候

初御徽涼雖非火浣之良庶存故實

苧布

土綾萍鄉出

以上袁州府

銅新喻舊產

石青一名石綠畫工呼爲碧青

煤炭

救公飢色白味香甘

茶芽清江縣出色味俱不甚佳

猴筍出新喻白梅峯

銀杏

黃柑各縣俱出獨萬碩州柑樹成林九秋甘實垂垂亦佳景也

柿有數種曰黃柿朱柿火毬柿炙乾者謂之烏柿日乾者謂之白柿又一種差小謂之輓棗其味甚甘

山礬花出新喻場岡

紫蘭新喻出

葛蒲新喻仰天岡湖中出開有九節者

石乳新喻出

茱萸新淦茱萸岡出

柏子仁

白藥圖經江西出者葉似烏柏子如菉豆至八月其子
變成赤色

黃雀宋時除入貢外饋遺朝貴以萬計州守王蘧禁雀
罷貢李大異作詩美之王安石送呂嘉問詩有云想因
君出守暫得免苞苴今則絕無矣

鵲鵲

野雞

麀

白魚新喻距河出

鱖

芒布

葛布

棉布各縣出

以上臨江府

茶泰和傳擔山產相傳溫道者受所種萬安神潭兩岸亦多種茶味香美故云蜜潭水神潭茶

浮筍泰和禾山出

玉版筍一名夏筍出白鷺洲

金橘萬安縣出金橘差大而味甜藏菜豆中則經時不

變蓋橘性熱豆性涼也見張世南游宦記聞又歐陽修歸田錄云金橘產於江西以遠難致都人初不識明道景祐初始與竹子俱至京師竹子味酸後遂不至而金橘香清味美置之樽俎間灼爍如金彈丸誠珍果也都人初亦不甚貴其後因溫成皇后尤好食之由是價重京師

楊梅出吉水楊梅嶺味頗類揚州

銀杏

尊安福蜜湖產

水晶蔥宋孝宗問周必大吉州所產何物必大對曰金柑玉版筍銀杏水晶蔥

紫苑本草出廬陵郡城西南廖岡嶺

坐竿草永豐縣秋田出六月開紫花結實土人採之以治打撲所傷

紫草龍泉縣東南四十五里許婆峯出

龍鬚草龍泉縣東南三十五里巾子石出用以編席吉水洞巖亦產

竹紙泰和出

抱石魚龍泉小江出

鯽魚安福蜜湖產味甘如蜜

翡翠廬陵出

雞泰和出腳矮毛紅與他雞殊以年久者爲佳人家有畜至十年者能治虛證陰證痘證其功效在湯不在肉茶油

豆豉泰和出性温能發能補年久者佳卽生蟲成灰者去其蟲用之亦佳

葛布各縣出

苳布出永豐縣藤田者佳

棉布各縣出

石膏泰和出

明蕭近高乞禁開採疏題爲地方瘠困已

殘以安民生以極不堪開採懇乞聖明亟收成命燭奸殛

科見江西北稅監潘相一本爲竭忠獻利裕國一便民事據

吉安泰和縣土民段永等首稱本縣官山一座名姥山

嶺出產石膏欲要自備資本立廠招商開採歲一見之

擔販賣徵收以裕國計等因奉旨準依議行臣一見極

駭且嘆曰有是哉小人之巧於逢君忽於腹民至此極

也自潘相凌毆宗室此字宙一於逢君忽於腹民至此極

之外而撫按奏之皇上悉置不問以故奸人窺知上意

虐然益張漫無忌憚相曰參政正佐當罰治旋有罰俸

之旨相曰石膏可採旋有開採之旨兩日之間俞旨三下

此三旨者皆非所以令天下也皆非所宜令眾庶見也

臣且先言石膏所以不屑開採之故大學孟獻子之言曰畜馬乘不察於雞豚伐冰之家不畜牛羊百乘之家不畜聚斂之臣獻子不過春秋時一大夫耳猶不屑與民爭尺寸之利堂堂萬乘之尊而乃蹈獻子之所戒乎皇上採金於山採珠於海猶曰此重貨也區區石膏何物質與土塊同賤與土塊等千斤之值不能一金不過編民蓬戶賣腐之家用之以爲漿及醫家開亦用爲藥餌而已就令如奸人段永之言一歲果可得萬擔變價能幾何哉王言如綵如綸而營及賣腐之業虧損聖德莫此爲甚臣竊爲朝廷恥之且非獨於此也卽以利言之其得不償臣竊爲朝廷恥之且非獨於此也卽以利言請言吉俗江右地瘠民貧食土之毛不足給衣食膏肓其口於四方而吉地瘠民貧食土之毛不足給衣食膏肓大作邨落之墟幾絕煙火今者重頻年水旱相繼疫癘矣向令石膏可以資生小民之趨利如鶩當不遺餘力而攘財矣又何必跋涉而走四方乎此山俗武山北利縣官何不從而徵之定爲稅額乎此山俗武山北距縣城八里許南距贛江六里許武山介於其中周迴不過二里三乃云有二十里之廣者是山能踰城而跨江也此欺誑之尤者若一旦開鑿不過旬日即可夷爲平地其發人家墓折人室廬破人田產不待言也按形家武山於縣治爲祖龍於郡治爲前嶂譬之人身挖其腦髓快其踵趾而望其生全有是理哉以萬擔石膏而易一郡一縣皇上以爲利乎不利乎況既曰自備資

本矣又曰照礦事例官四民六是皇上之得利少奸民
之規利反多也況既立廠必且差官校一出蠅聚蟻
附有利司供億之煩費無名額外之剝削百孔千瘡莫可
窮詰分毫皆小民膏血是利歸羣小怨在蒼生而害獨
陰移之皇上也使為國家斷蓋世明並日月何見不及此
邪大抵小人之使為國家惟規規目前之利是營而欲
顧異日釀國家莫大之隱憂惟思百計以中主上之欲
結一時之知而不顧後日其言之必不可踐如近日魯
登科之代奏鹽商五萬日可為永鑒矣皇上母墮奸人之
欺於魯登科奏鹽商五萬日可為永鑒矣皇上母墮奸人之
計大彰審斷亟可再欺於潘相段永文明等明正欺罔誤國
之罪寸斬以謝天下將潘相段永文明等明正欺罔誤國
監無忌憚者之戒斯國憲昭而奸邪斂迹民志定而禍
亂潛消不然臣誠不知所稅駕矣臣狂愚不識忌諱謹
以前不勝顛越待命之至君父

土青廬陵永豐出明蕭近高參內監疏題為一省兩監

以奠民生事臣昨閱邸報有江西太監歸併以廣皇仁
額徵收有歸審務允宜親歷專駐劄以效涓埃事大約
謂各礦封撤稅包有司相於額奉聖諭事大約謂描畫
剖景鎮專理審務又一本為題準漸青為上等堪為上
瓷器須用土青土青之山中惟題準漸青為上等堪為上
供其餘廬陵縣錫瓦山永豐玉山二縣徐鳳等山土青

顏色淺淡皆中下等無當御用欲變價隨稅恭進職以
爲潘相此舉過矣查得武宗皇帝時曾欽遣內臣督理
密務至世宗皇帝英明遠矚旋卽革去專令饒州府官
一員督造於時歲進未嘗不額也器用未嘗不精好
也節年遵守至今便之卽或閒有粗穢嚴責成於有司
有司奉法急公未必在內監之後也何爲潘相未奉明
旨而徑往駐劄乎謂之駐劄相蓋欲爲久駐之計營三
窟之安非特一時巡歷之比也夫不待奏請而徑行駐
劄是曰自擅既已駐劄而始爲題知是曰要君相罪至
此可勝原哉況一相一出必且宏軀衙門繁侈供張必
多帶參隨另作一番威福區區一鎮何能堪此魚肉往
年相曾出巡一次據所奏云臣將抵鎮民張樂焚香導
臣三十里之外嗟乎聞有簞食壺漿以迎撫我之王師
矣未聞前歌後舞以導導有簞食壺漿以迎撫我之王師
遂激變土民楊信三等陷繫通判陳奇可等以致燒燬
御廠焚劫御器潘相僅以身免至今鎮民欲甘心焉相
猶欲蹈其覆轍乎臣聞鎮上傭工皆聚四方無藉游徒
每日常不下數萬人稍一騷動響者四應苟復激變如曩
時當此皇恩浩蕩之日覩此景象相一應苟復激變如曩
過明詔虧累聖德良非渺矣臣愚以爲密務責成有司
便若潘相者報撤也至於土青誠燒造所必資者然
潘相未開採之先不聞匱乏也相之欲開採者不過藉
口上供耳夫浙青既稱上等以代回青之用留之以描
畫御器誠非得已至如永豐玉山廬陵三邑所出者相

亦評之爲中下品矣此何當於御用而必欲採之乎詔
書曰一切山洞封閉以固天地之御用而必欲採之乎詔
山之在皇輿內一小培塿耳皇仁溥博無微不被何三
邑山靈不得與敷天率土共邀新澤哉且據相所奏不
過欲取此中下之青變價進上夫既等之爲中下矣所
變之價能幾何哉不啻九牛之一毛耳皇上豈有賴焉
又何過聽仍遺此不了之禍於民閒也臣愚以爲浙青
係供上用者誠不可已彼三邑者終當報罷不可復採
也大都江右水土瘠民貧無他奇產民皆仰食鋤口於四
方加以頻年水旱相仍幾年來苦此兩監欲顧天而無從
潘相咆哮於省會十數年礦既撤矣稅責有司矣歸併
也幸宸衷默啟聖政維新礦既撤矣稅責有司矣歸併
於一稅監理之綽有餘裕相何所事潘相撤回正其擅
爲地方禍者伏望聖明大奮乾斷將潘相撤回正其擅
行駐劄之罪庶少一聖明大奮乾斷將潘相撤回正其擅
行有司督造責令及時解進其土青之害其審務專
陵者務遵詔旨盡行封閉諭令有司不必採解將令江
右之民生如出水火而維新之德政益光史冊矣以
安府

金臨川縣出宋置場在縣西四十里卽廢

銀金谿縣出唐置置場尋廢

銅臨川出宋嘗設監鑄錢後廢

鐵郡城東百二十里東山產鐵宋乾道閒置東山鐵場其鑪凡四曰羅首坪小漿赤坵金峯後以山空俱廢五十日占田家種以續食

碧蓮宋時產於臨川縣尉廳者最勝畫工目爲撫蓮

玉茗卽白山茶宋時郡東院產家太守坤翁謂古樹奇

花天下止此一株在楊州瓊花之上而今亡矣宋黃庭堅白山

茶賦并序姨母文城君作白山茶賦興寄高遠蓋以自

況類楚人之橘頌感之作後白山茶賦孔子曰歲寒然

後知松柏之後彫也麗紫妖紅爭春而取寵然後知白

山茶之韻勝也此木產於臨川之崔嵬是爲麻源第三

谷仙聖所廬金堂瓊榭故是花也稟金天之正氣非木

果之匹亞迺得骨於崑崙非乞靈於施夏造物之手執

丹青而無所用析薪之斤雖睥睨而幸見赦高潔皓白

清修閒暇斐回冰雪之晨偃蹇霜月之夜彼細腰之子

孫與莊生之物化方培戶以思溫故無得而陵跨蓋將

與日月爭光何苦與洛陽爭價惟是當時而見尊顯處

於瑤臺玉墀之上是以閉藏而無悶淡然於乾楓枯柳
之下江北則上徐庾江南則數鮑謝蓋不能刻畫娉娥
蕭飾姑射諒無地以寄言故莫傳於膾炙況乎見素抱
朴難乎郢人故徐熙趙昌祗筆和鉛而不敢畫或謂山
丹之皓質足以爭長而更霸知我如此不幾乎馬雖瓊
華明后土之祠白蓮秀遠公之社皆聲名藉甚俗態不
捨挾脂粉之氣而蘊蘭麝與君周旋其避三舍

山礬高可數尺春時開小白花香氣清甚王荆公以其
白名曰瑒花黃山谷以其葉可染名曰山礬

楓柯樹同本共枝惟葉分兩樣出東鄉源頭山演教寺
二處相傳爲吳道人所植

四季青楓能四季長青故名出東鄉楊橋羅姓屋後相
傳爲羅秀女所植

朱橘各縣出

棓侯柿金谿出東都賦梁侯烏棓之柿卽此

黃精金谿崖山最多

萑蒲生石上九節者佳亦不常有

茅可縮酒唐開元閒有上封事者言撫州三脊茅可用
祭祀宋太平興國中祀泰山亦下撫州採之
石炭出臨川北鄉之王家洲崇仁之七寶石

沙糖

清江紙金谿出

牛舌紙以稻草爲之崇仁宜黃出

裱紙宋人墨刻以用撫州裱紙者爲貴今絕無矣

紅白凝酥鰲鮓也金谿出

苧布金谿出

葛布崇仁宜黃出

水棉布東鄉出

赤箭莖如箭幹根類天門冬祇無心耳去根五六寸許有數子爲衛如芋此草無風自動俗呼獨搖草

以上撫州府

銀南城縣出宋時有太平等坑元豐九域志南豐宋置銀場四今無

紅朱稻米卽今赤珠粳色純紅而堅唐時貢

銀珠米卽今八月白色白而香宋時太平沈造嘗獻

蔣菜新城出

香薷各縣俱出新城尤多

茶各縣出

麻姑酒神功泉在南城麻姑山清而甘美宜於釀酒故盱江有麻姑酒

蜜橘

石榴

梨土產名青宵梨

山茶產南豐山茶洞

並頭蓮最爲奇品

梔子花瓣重疊名玉樓春

蘭

芍藥赤白二種南城出

澤蘭

五加皮

畫眉性好鬬而善鳴

鴛鴦物之有思者

江西南昌府志卷之六 物產
藍靛近自汀得種

扇近時新城造作差勝

金絲布唐時貢今無

絹各縣出

夏布不紡者曰扁紗布紡之者曰圓紗布

葛布各縣出

土緞各縣出朴素若北方土綾近織竹葉筆管花樣

以上

建昌府

早穀有救公飢三朝齊六十日占九十日占又有冬早

穀粒似阜而芒長

晚穀米白性膩

白穀有竹丫早白沙早紅根早又有紅穀曰夏桃紅北

風占

糯穀有早糯紅糯白糯重陽糯胡椒糯竹亞糯

銀弋陽玉山二縣出元豐九域志弋陽九鄉寶豐鉛山
七鄉宋置銀場今無

銅弋陽鉛山二縣出今悉罷

鐵玉山貴溪弋陽三縣皆有場久罷惟上饒永樂鄉場
尙存

鉛鉛山出久罷采

水晶上饒靈山鄉出明天順閒以不堪用罷采

礬鉛山出

石膽鉛山有之

白青本草出信州今不復見

石綠圖經出信州

砒玉山有砒井封禁甚嚴

自然銅圖經出信州

赤石脂鉛山出

大戟本草出信州

紫苑本草出信州

葛粉各縣出

砂糖以蔗汁煎成鉛山出

蠟有黃白二種

冬筍冬春皆挖取冬產者良河口鎮烘乾經年不壞曰筍片

藕粉舊時蓮子畚池沼供玩賞今種者已多藕可作粉

蓮子價重幾倍於稻亦近利之可守者

白蓮上饒廣豐爲多

金魚貴溪金魚尾有三岐至九岐者鉛山次之

柏油上饒最廣他邑皆有

叢絲紬上饒玉山廣豐出

兼絲布以絲芒雜成鉛山出

苧麻上饒居多他邑亦閒有之

葛布廣豐出

菸廣豐出

茶七邑俱產土人多不善製

謹案府志拾遺云宋先有周山茶白水團茶小龍鳳

團茶皆以佐建安而上供惟桐木山出者葉細而味甜然終不如武彝味清苦而雋永凌霄而采出膏者光含膏者皺宿製者黑日成者黃蚤取爲茶晚取爲茗紫者上綠者次三月初清明前采筍爲上春清明後采芽爲二

春四月以後采葉則不入茶經水乳泉上江水次井水
下若采茶以後精行儉德之人毋以婦人辦犬到山乃爲
清明釋滯消痰解煩渴蘇軾節然作法還以不翦爲佳
而味性存焉國朝鄭日奎西山茶課記西山在弋之
西北山勢巖從互十數里土與石間之林壑初無大異
其名也以產茶寺居高山之麓僧亦以種茶爲業住持老
衲驚湖人也臘甚高好談前朝事客至無他供惟以茶
啜茶次輒爲客述明時弋之茶害也正德中甯藩勢張
甚每歲春輒遣官校督茶芽凌轅官吏民苦之己卯逆
藩敗弋患始去邑人汪少宰有庚辰春日飲茶詩意蓋
指此而今幸矣無他慮矣因爲誦汪公詩客皆色然喜
欣然笑也更啜次僧復爲客述明末鉛之茶害也信七
邑皆產茶初無絕佳者故不以供上獨鉛邑有茶戶
有茶課課額歲入勛耳不爲民厲何時例忽起每歲清
明課茶時除正供外自監司以下逮丞尉皆有餽名曰
薦新實則本處所產不能應皆市之他郡以充之民歲
費金以數十計已苦之矣何時例又變每歲課茶時除
正供本色外其他餽贈悉以銀代之於是民歲費金以
百數十計茶戶或稱貸償或以銀代之於是民歲費金以
閒者已而相率逃去則科之合邑之糧里費益不貲害
益深矣邑人盛處士有納川採茶歌意蓋指此而今不
知何如也因明誦盛子歌歌未終客皆慘然不樂太息
而起飲而別

盜器弋陽湖西馬坑審民皆業陶如叛罐鋼甕盤碗之類器麤醜郡邑資之以給工匠之用謹案舊志弋陽縣太平鄉有盜器審初以處州民瞿志高等創造後民飢爲亂嘉靖間卽橫峯審鎮地改立興安縣審遂廢

紙玉山東北鄉有楮皮紙廣豐東鄉亦有之其楮皮俱出自湖廣鉛山貴溪有白鹿紙煑竹絲爲之今鉛山者佳有高簾紙俗名蓬紙上饒有黃白表紙亦有連四紙俱不甚佳弋陽黃家源石壠等處雜竹絲荻蒿爲紙不可作書謹案府志拾遺云石塘人善作表紙搗竹絲爲蓬紙以竹絲置於池中浸以石灰漿上竹梘鍋煮爛經宿水漂淨之復將稿灰淋漉水上梘鍋煮爛復水漂淨之始用黃豆泔注一大桶梘一層竹絲則一層豆泔過三五日始取爲之白表紙止用藤紙藥黃表紙則用姜黃細春末稱定分兩每一槽四八扶頭一人春碓一人檢料一人焙乾一人每日出紙八把王宗沐江西六志廣信府紙槽前不可考自洪武年間創於玉山一縣至嘉靖以來始有永豐鉛山上饒三縣續告官司亦各

起立槽房玉山槽坐峽口等處永豐槽坐柘楊等處鉛
山槽坐石塘石壩等處石上饒槽坐黃坑周邨高洲鐵山
等處皆水土宜槽窮源石峽清流湍急漂料潔白蒸熟
碼細藥和溶化澄清如水簾撈成紙製作有方其槽所
非一地故附屬因革無從稽覈矧係民屋姑紀其略耳
自湖廣之竹所產於福建簾產於徽州浙江自昔皆屬吉
安產槽戶雇倩人將前物料浸放清流急水經數晝
土足踏去殼打把撈起甑火蒸爛剝去其骨扯碎成絲
夜刀對斷攪以石灰存性月餘仍入甑蒸盛以布囊放
於急水浸數晝夜去灰性月餘仍入甑蒸盛以布囊放
無論月日以白為度淋多手陰乾半月澗水瀉透仍用
灰及漂柴灰和勻滾水淋多手陰乾半月澗水瀉透仍用
蒸水漂暴曬不計徧數又放手急流洗去濁水然後安
如炙揉碎為末布袂包裹又放手急流洗去濁水然後安
放青石板合槽內決長流水入槽任其自來自去藥和
溶化澄清如水照依紙式大小高闊置買絕細竹絲以
黃絲綾織成簾牀四面用篋綳緊大紙六人小紙二人
扛簾入槽水中攪轉浪動撈起簾上成紙一張揭下疊
榨去水逐張掀上方始成紙工難細述論雖隆冬炎夏手
火燒薰乾收下方始成紙工難細述論雖隆冬炎夏手
足不離水大諺云片紙非容易措手七十二司禮監
行造紙名二十八色曰白榜紙中夾紙勒合紙結實榜

紙小開化紙呈文紙結連三紙綿連三紙白連七紙結
連四紙綿連四紙毛邊中夾紙玉版紙大白鹿紙藤皮
青紙大楮皮連七紙鉛化紙大紙油竹連七紙小紙白鹿紙廣信
皮紙小戶油紙一方榜山奏本紙上定竹例五年題造一次乙字
庫行造紙名一十榜色日大上白榜大青榜中夾紙大紙開化
紙大玉版紙皁龍榜紙以上隨缺取用造解無期紅榜明黃
榜紙綠榜稱皁信府鉛山玉山永豐三縣原係產紙地
史邵陞疏稱皁信府鉛山玉山永豐三縣原係產紙地
方既欽依派造自應如期速完解進緣在官積槽悉係
市井豪猾依託把持行市高擡時價一弊到居為奇貨百計鑽
營令依期造解以供市用情尤可原且領種銀入手即便
設為已有蕩費不貲不才委官吞餌口承行吏尙未
視行私上恬下玩日化月遷以故頭運限七年尙未
完造起解是上竊公家之職貢屢飽私囊下腹小民之
脂膏抗違延緩臣等亦何所逃罪極私囊兩奉明旨催辦
任其抗違延緩臣等亦何所逃罪極私囊兩奉明旨催辦
道查議并弔該省賣紙鋪戶所逃罪極私囊兩奉明旨催辦
臣等尤恐有礙覆布政司再議重覈一審親定時價
數計算白榜每張銀六釐白大釐中夾紙每張銀
六釐五毫白大開化紙每張銀六釐五毫白大開化
六萬一千五百兩比前減去虛擡價銀五萬零一百兩
木櫃套槓索鎖袱等項工料及解戶盤纏三運共實

該銀九千三百七十九兩六錢三分二釐比前減去多費銀
三千八百七十九兩四錢零除頭運多去銀三千四百
四十兩姑依司議免追其枉解及解官衣糧等俱照舊
規給發外即頭二運見徵貯庫銀兩足抵三運之費可
免槩省加派尙餘三千九百有奇輪納不前仍復帶徵
早漕不常小民愁苦卽今正供聞日夜思維休息無策
年逋賦臣等待罪地方目擊一耳聞之賜臣等豈敢爲
似此浮蠹若減一分則民受一耳聞之賜臣等豈敢爲
刻削以沽節廉於受直而敏於趨事哉祇緣向來積弊
輸之術使之廉於受直而敏於趨事哉祇緣向來積弊
皆係市井姦豪射此爲利始以夤緣之費祇緣向來積
分例之實徇官吏十分之限催督僅照時估向本業紙
轉展覓息及奉臣等嚴限催督僅照時估向本業紙
勒買供官毫無加益似此浪費銀兩上不在官下不在
民盡屬姦豪漁獵而復蔑視上供苟延歲月浸不完解
良可痛恨故臣等今日之所議裁侵漁之積弊而
非裁紙張之實價也臣等今日之所議裁侵漁之積弊而
積槽而非革之本業也臣等今日之所議裁侵漁之積弊而
得人完解自早矣除將頭運三百萬張嚴限勒完縣主
如式仍委傳昂於三月初六日起解又另委奉新縣主
溥唐士廉沿途價運去後但念立法之始若不題請著
爲定例恐將來官更案冷此輩復覲爲題伏乞敕下工
部再加查議如果臣等所可採速爲題覆將議定紙
價數目載入杏剏并乞敕入著落司府掌印官呈委風

力府佐貳官一員專管其事不許別項差委卽遇升遷亦要責令完事方許離任管一運畢詳送臣等考察一次如果督買合式完解及時卽於起運文內開薦工部以憑轉咨吏部紀緣升擢否者叅究不得姑息庶幾責成之法嚴則上供不致愆期浮淫之蠹汰則民力漸從休息卽紙戶身親貿易得價贏於時估當官又無虛費蒙惠非小一舉而三善備矣

硯山懷玉山

宋朱子懷玉硯銘并跋我輯墜簡大法以存孰摯其寶使與斯文點染之餘往壽逋

名墨爾毫端毋俾元白慶元丁巳三月庚子懷玉南溪近出此石徐斯遠以余方討禮篇持以爲贈會分半彙以屬呂子約於高安因撥寄之慶元繼圍大荒落日南至晦翁記以上廣信府

金鄱陽縣有地名黃金采漢書注謂采取金之處宋時

德興置金場一今不可得宋洪邁減貢金劄子紹興開

一千兩而焚金十兩之額與他例同此不與焉本州先期敷科吏緣爲姦豪商操權私價轉增遂致一方久罹其害人莫敢言罔知所起或云藝祖初年江南郡庫適有金取以獻長春節遂爲例或云發運司持錢收買或云政和以來轉運司撥所部內散收三說得之傳聞無所考信第民困官憂已非一日後郡守唐文若奏乞蠲

減詔付兩省時戶部郎魏安行持示左藏以他州舉例
為辭遂不得免所謂諸路祇貢聖節只繫銀絹饒固有
之且已兼任泉臬兩司之數乃若貢金千兩獨此郡任
焉與他不等蓋失於數陳也陛下恭儉愛民雖和糴百
萬一劄盡免苟知此患必垂矜恤夫千金在朝廷為甚
少在州為甚多況民力極敝甚不堪支朝廷金除
交鄰錫資外所用不多可與減除昔仁宗采張方平之
對直降手詔罷河北推鹽父老僅迎澶淵且刻之石臣
之州民豈不知此臣不敢以鄉井自嫌隱默不言倘蒙
聖慈不以臣言為過願勿下有司徑以御筆蠲減令本
州酌量措買不得仍前科斂民困稍蘇此忠漸
息仰請恩旨特賜宣示干犯宸嚴無任惶懼

銀德興縣銀山一名鄧公山唐總章初置場至宋天聖

閒山穴傾摧而銀課未除范仲淹守郡請罷於朝因有

詩云三出專城鬢已霜一封奏罷鄧公場

銅德興舊產元豐九域志宋置銅場明史食貨志明初

銅場惟德興鉛山兩處後始開四川山西陝西雲南

石墨樂平縣樂平山有之似墨舊名石墨山

天鵲鄱陽出

雁禹貢彭蠡既豬陽鳥攸居

鷺鷥各縣出

麋樂平出

兔浮梁出

牛尾狸宋洪容齋嘗侍壽皇宴因談肴核上問容齋曰
卿鄉里所產何物對曰沙地馬蹏髓雪天牛尾狸

蟹鄱陽餘干出

蚌鄱陽縣西有蠓州唐貞觀中嘗有採珠於此者因名
銀魚

南星鄱陽浮梁出

寒水石鄱陽浮梁出

茯苓

白芍藥

烏藥

史君子俱浮梁出

獨腳蓮德興出

竹各縣出

茶饒州出茗其利最夥然味不及信州唐李孝標送饒州張蒙使君詩有日煖持筐依茗樹之句

甘蔗樂平出

糖德興出

酒樂平出

柏油鄱陽餘干萬年俱出

紗饒州出紗頗堅厚似絹

芒布各縣出

瓷器浮梁景德鎮出別詳陶政

以上饒州府

石耳出廬山削壁上大者如盤攀援採取形如苔

野葛出廬山根可作粉

豆葉菜出廬山桃花峯側方二里許名豆葉坪其味鮮
別亦可蘊他山皆無

薑都昌縣出

萬年松生廬山陰澗中以砂石栽之乾不死

方竹生馬祖山及智林寺大者可杖

石竹中實如藤產五老峯下

蘆筍

麝囊花舊出廬山花色正紫類丁香號紫風流見陶穀
清異錄

春芙蓉如蓮花大其枝高過於人其葉四時青翠出廬
山

楊梅

山桃廬山頂上有止得於上飽噉不得持去

山石榴三月中作花色似石榴而少淡

葡萄莖細花紫白味微辛可食各縣出

銀杏出建昌雲居山者無心

茶匡茶香味可愛茶品之最上者又元豐九域志出雲
居山者土名攢林色香味皆佳雖閩之陽羨浙之龍井
六安之銀鍼無以過焉

石斛星子縣出

半夏

山藥

香薷一名石薺生石上者佳

山茨菰一名金鐙籠生陰澗中七葉一花

枸杞

黃精

金櫻子各縣出

紫金藤建昌出

石花魚廬山諸龍潭有之大者三數觔

砂鯢廬山澗中有之大僅寸許

蚌蚶星子出

雁彭蠡湖中有雁泊小洲

天鵝建昌出

野牛形似黃牯頸長腹大尾如毳廬山有之

鹿

麕

竹雞

絹都昌出

葛布星子出

紵布各縣出

硯池星子出

木炭

宋朱子論木炭錢利害謂子熹昨日伏案而論究實都昌木炭價錢利害特與獨減仰見仁人君子

所以愛民之實適準使帖謹已遵稟施行續當條上然熹竊伏思之復有一說上可以推廣台慈矜恤之惠而

下不至於多失有司經常之入敢預言之以俟採擇議
案木炭本以稅絹紐計納本色比之納絹所費已增一
倍之數折納價錢比之納絹所費又增三倍之數反覆
紐折至於數倍上違法意下損民力本軍三縣皆受其
弊然二縣距使臺為遠津般本色共費不貲故雖價錢
稍重而不敢深以為苦都昌則距使臺甚近而津般不
難故獨願納本色而深以價錢之重為病要之以錢比
絹而論之則三縣之事體初不異也熹前者妄論未能
及此今乃幸蒙矜念更令充實卻與蠲減是以熹得復
有所言欲望人戶卻令且依舊送納庶幾一郡細民均被
其賜而兩等戶事力稍重猶可不至大段狼狽兼亦
不至多失使司財計免致別有經畫實
為利便須至申稟者 以上南康府

紅穀有鴨掌和柳條赤等名

烏穀殼黑色而多芒五月始種

芝麻有黃白黑赤四色

茶五邑俱產惟廬山出者味香可啜

筍

紅花各縣出

藍靛有木藍蓼藍二種

紙楮皮紙出瑞昌草紙出德安

漆瑞昌出

蠟瑞昌出有黃白二種

桐油瑞昌出

石耳產廬山五老峯巔取之甚難

無名土出德化濂溪書院嶺麓可以入漆

元參德化出

雲母石德化出

石斛德化出

何首烏瑞昌出

乳香有石乳楓乳二種

虎掌葉大如掌面青背紫四畔有芽治心痛寒熱圖經

出江州

薏苡

紫河車一名金綫重樓草出廬山

紫蘇

牽牛

枸杞

牡丹

梅

寶樹出廬山上大林寺形如寶塔相傳耶舍尊者西域

攜植

江寧通志卷四十一 物產
柏德安瑞昌爲多

楮皮可造紙實可入藥

箭竹節疏肉厚可爲矢幹

墨竹瑞昌產蘇東坡謫黃州過瑞邑援筆賦詩灑墨於
竹而成斑

鶴狀如鶴

雁

鱸魚

鮓魚似白鰱仲春始出魚之極美者多出彭澤

鯉魚卽鱣似龍而色黃大者千餘觔

鱖魚卽鮓似鱣而小色青墨九江鱖鯉酢乃食品之最
著者

魚苗出德化迴峯磯及湖口八里江

蟹德化出

絲各縣出終不如吳絲精白故曰生絲

木棉洲鄉近種木棉與雜糧各半收成勝於他產德化封郭桑落二洲所出核小而絨多彭澤涼亭馬當所出爲盛

以上九江府

鐵大庾鐵岡舊有冶宋上猶置鐵務今廢

鉛錫崇義舊有鉛廠宋瑞陽置錫務見九域志久廢石綠宋時南康綠池產石綠尋竭

茶磨石上猶縣出脈紅如綫極鮮明者最難得土人以白脈者爲銀綫黃脈者爲金綫

土茶出崇義龍歸山與普洱茶相似亦能消滯解熱

竹紙出大庾行路坑其坑之水惟一處可造紙

香蕈崇義出

澱崇義出

蜜梨出雙秀山

靈桃舊傳大庾雲山出游人欲食禱之乃許啖一二不得持歸

珍珠李

落花生一名長生果南康出行遠而利溥

糖用蔗漿煎成與閩粵所產相類南康出

菖蒲產大庾歐公峒閒有一寸十二節者近不多見

仙茅出大庾嫦娥嶂傳是葛仙丹液化成張汝弼詩有
庾嶺仙茅舊有名之句

樹蘭上猶出

春蘭葉稍闊而短花微紅

青蓮出大庾管界都上角頭藥差小不結房色如碧玉
箭竹節長二三尺又鳳尾竹低叢細葉可爲文玩俱上
猶出

水竹崇義龜山產其節極疏而肉薄可爲笛又符水竹
山產竹小而輕

山梨堅韌可製器

杉木

牛筋木俗名水浸荆產聶都山可爲椎棍轎杠之用
茱梁藤蔓於樹根頭如薯可以染絳

椶櫚

江西通志卷四十六 物產
山鳳似喜鵲觜紅尾長

畫眉崇義出

雪鰓崇義出

金鰓崇義出

以上南
安府

銀元豐九域志零都六鄉宋置銀場

銅長甯銅坑嶂相傳舊產銅今無

鐵會昌鐵山舊出鐵久無

錫宋世產錫有九場虔州安遠零都天井會昌拔溪久
廢

鉛元豐九域志虔化六鄉寶積宋置鉛場

釉贛縣北五十里黃龍埠有釉穴景德鎮用以釉瓷器
紅石興國各處俱有惟產瀧下水者最佳丹崖爛然

諸邑暨吉臨數郡俱賴其用

澱漬小藍葉和石灰澄瀝成澱用以染緇贛縣山谷多有

漆贛漆品居廣漆之上與欽睦等

儲茶出贛縣儲山曰大圓儲茶味香亦佳

菘有二種莖圓厚而微青曰大菜扁薄而白曰白菜葉皆淡青白色

紅糖卽紫沙糖蔗汁煎成各邑俱產贛零信最多

勃薺出會昌黃全者最佳

藕粉出長甯尋鄔堡者佳

橘所在多有

柑出興國又有一種名金柑

江右通志卷四十一物產
三
桃出龍南冬桃山經冬始熟

梅花白者結實紅梅紅萼供玩而已龍南紅梅尤盛
梨龍南歸美山石城內有郡西城產者佳有以樟樹接
生者

水晶果出龍南歸美山今無

蘭一幹一花者蘭一幹數花者蕙贛俗通稱爲蘭

報春蘭一莖一花開於元旦立春

紅蘭生山谷中經野燒葉盡而花獨發俗稱火燒蘭
樹蘭大者高八九尺花開成穗有三葉四葉五葉七葉
之殊以五葉爲貴

木蘭會昌有二樹一在雁湖一在下蘆高數十丈香聞
十餘里

茉莉曠產皆常種業之者以千萬計舫載江湖歲食其利

夜來香日暮始花故名

蓮生雪都瑞蓮池者有三萼二十四葉之異相傳雪山倒影所致移植他處則如常種

白蓮生會昌盤固山

匾竹興國蓮花五門洞有相傳謝肇以指握竹一節遂匾今其竹皆匾一節

石竹生府城內鳳凰池中

方竹大者不過拱把以龍南爲盛

杉木赤爲香杉白爲土杉龍南人運售外省獲利最饒
鸚鵡產龍南歸美山形色鮮潔自愛毛羽

雞大凡雞鳴於丑贛雞至亥輒鳴李贊皇有三更津吏報潮雞之句

龍豬以龍南得名醃小豬作土儀宰殺日多鄧元貞有禁革龍豬碑

膏魚會昌白埠山塘溫泉出肥美如膏故名

五色鯉出信豐穀池十道志南康出五色鯉卽此肥魚龍南肥潭產無骨味佳二月出者名桃花魚八月出者名桂花魚今潭涸魚無

龍頭魚以龍南龍頭灣得名長二三寸冬月乃盛風味最佳

黃連粿都黃連山有

金毛狗脊苗似貫眾根長多岐狀如狗脊外有黃毛鱗

屬山野處處有之采根收存用其毛療金鐵傷

菸各縣皆種

席贛縣會昌安遠皆產會昌黃坊出者尤密緻耐久

茶油贛州山多茶樹十一月採子剖仁榨油色味甘香
清潔名曰清油

桐油冬收子榨油可入漆可造紙

布龍定二邑多織木棉布棉爲本地所產

夏布歲可三刈女績爲縷機工織之造布極精

葛布信豐會昌安遠皆出用純葛絲織成者則韌而耐
久沾汗不污惟會昌更佳

繭紬信安長諸邑出韌軟適體亦有采染五色絢爛者

以上贛
州府

金瑞金縣以此名南唐有監今無

銀

銅元豐九域志瑞金四鄉九龍宋有銀銅場一

芥茶出州治紫雲峯香味第一不可多得

雪筍壩坊所產皚白似雪鮮脆甘芬

簽筍產會同鄉五月中生味甘美隨意所欲取之盈把
若先以語人則不能得一枝亦事之靈異者

菰出州治者最佳肥厚脆美有一本重十餘觔者與北
方黃芽並美

雪瓜出瑞金味甘多漿

梅中華山梅四季皆花惟春花結實相傳宣德間都御
史陳勉所植今猶存

杉木山居多種之州治及瑞金石城食其利者眾

貢麴

藕粉

白茅

銀麴州治出向例贛州府採辦秋貢

三黃丸石城熊氏世傳其業以黃連黃柏黃芩合他藥
取縣北木井塘水製丸治熱病多效

墨瑞金產徽人來縣製造流布之廣與徽墨等

龍岡硯出石城龍岡

金箔

菸瑞金最多邑人謝重拔作禁種菸議

龍頭魚出石城龍下渡故名長寸許無骨三月始有過

期則無亦稱佳品

砂糖下鄉出

茶油州治界連瑞金團箕山多產茶油

桐油所出較茶油少

夏布州俗無不緝麻之家匠織成布女紅利普石城亦

出以上甯都州

土貢

唐豫章郡貢葛十五匹柑子六千顆鄱陽貢麩金十兩
簞一台南康郡貢竹布二十四匹臨川郡貢葛布十匹廬
陵郡貢白紵布二十端陟釐十觔潯陽郡貢葛十五匹
生石斛十觔宜春郡貢白絲布十匹宋筠州貢南燭子
信州貢金吉州貢藤明有額辦有歲辦額辦曰薦新芽

茶茶戶採辦歲辦曰野味翎毛魚油鹿皮麕皮皆折鈔

通典 太平寰宇記 江西大志

國朝貢額

摺扇二十柄

萬年紅帽緯五十匣

西山葛布五十匣

虔化夏布五十匣

南豐扇五十柄

永新磚茶一箱

安遠茶一箱

廬山茶一箱

鉛山香蓀二桶

鄱陽蝦米二桶

萬年紅硃錠五十錠

福字箋五十張

雲龍箋五十張

瑞金墨五十錠

蓮實二桶

橘餅二桶

南棗二桶

石耳二桶

銀魚二桶

藕粉二桶

勃薺粉二箱

江西通志卷四十九